

東
華
續
錄

東華續錄

同治四十四

臣王先謙敬編

臣張式恭恭校

三月丙申朔諭議政王軍機大臣等惠慶奏滿城危急請催關內大兵星馳援應一摺逆回竄陷濟木薩古城兩綠營後乘勢圍困滿城於上年十二月間北城迤東突被地雷轟發角樓震圯城身幸未大損該逆蜂擁撲城官軍力戰擊退其城垛震傾之處經八旗老幼婦女多人幫同運送輒上乘閒堵補完固該逆攻撲滿城勢甚鴟張亟須厚集兵力以資捍禦色普詩新統帶兵勇已由奇台取道赴古著卽剋期前進與惠慶聯給防剿毋稍稽延楊岳斌當已部署起程著懷遵疊次寄諭迅帶新募勇丁赴甘剿賊並飭令彭楚漢等將未經募足之勇趕緊招練陸續西發以便騰出穆

圖善等軍出關聯捷前經令由山陝等省取道出關此時諒已抵晉著於所謂黑龍江官兵到時卽行統率星速進發不許藉詞逗畱前據崇恩常明慶明奎章扎拉芬等先後奏報願隨聯捷出關剿賊俱經降旨允准軍營事權必須統一始可師出有功所有崇恩常明慶明奎章扎拉芬各員均著歸聯捷節制一切軍營奏報並毋庸崇恩等列銜以免紛歧都興阿前派署總兵德祥帶兵千名前赴哈密扼剿此時行抵何處著都興阿等飛檄德祥迅速前行鶴齡一軍如無須畱防西甯卽可飭赴關外助剿並由都興阿等隨時酌度辦理古城旗營婦女竟能幫同運送輓上其保危城洵屬深明大義著惠慶加意拊循隨時獎勸並准酌加賞賚以固軍心古城待援急於星火色普詩新聯捷等務當體朝廷廕念邊陲之意剋日整隊邁行儻再事遷延致誤軍事該大臣等自問當

得何罪惠慶仍當激勵在城兵勇協同固守以待援軍毋稍疏懈
將此由六百里各諭令知之○丁酉諭內閣前因已革提督田興
恕濫殺多命並被參各款降旨將田興恕革職拏問交張亮基等
秉公嚴訊定擬罪名嗣據勞崇光張亮基奏查明田興恕濫殺各
款並幕友張茂萱等劣蹟分別定擬一摺當經諭令總理各國事
務衙門妥議具奏茲據奏稱田興恕等應得罪名請卽照勞崇光
等所擬分別議結等語此案田興恕任用匪人多行稅政玩視軍
務又於無辜之傳教人文乃耳等濫行殺斃多命尤屬殘暴任性
據勞崇光等奏稱應照二罪俱發以重者論之例從重定擬仍將
連次恭逢恩赦例應減等議罪之處聲明請旨田興恕著卽照勞
崇光等所擬發往新疆充當苦差不准援免並著迅速起解毋任
逗畱革員張茂萱卽張心培謝葆齡以幕友濫膺保舉攬權怙勢

貽害地方懲惡田興恕種種妄爲獲罪甚重均著發往新疆充當苦差已革道員繆煥章前署貴陽府知府多文於田興恕剛愎各情曲爲迎合實屬荒謬業經月案革職均著永不敘用前署貴州巡撫韓超於田興恕奉旨赴川屢次瀆奏請留實屬不諳政體著交部議處○諭議政王軍機大臣等前因勞崇光張亮基奏審明已革貴州提督田興恕殺害教民一案分別定擬一招當經諭令總理各國事務衙門議奏茲據奏稱田興恕等應得罪名請卽照勞崇光等所擬議結等語本日已明降諭旨將田興恕發往新疆不准援免張茂萱卽張心培等分別定擬矣田興恕種種妄爲貽誤軍事實屬罪無可追卽置之重典亦無應得從寬問擬新疆已屬法外施仁見在是否羈禁秀山抑已到省著崇實賂秉章卽行派委妥員將該革員剋日起解不得任其藉詞延宕致干咎戾張

茂萱卽張心培謝葆齡均著勞崇光等卽行派員起解並著崇寶
駱秉章等將該革員等起解日期飛速奏報不准稍涉稽延餘著
該督撫等妥爲辦理總理各國事務衙門原摺著鈔給閱看將此
由六百里各諭令知之○戊戌諭議政王軍機大臣等楊岳斌奏
招勇業已成軍迅卽督率赴甘一摺據稱總兵彭楚漢楊明海等
招募湘鄉衡山等處壯勇業已成軍各營軍裝器械一律齊備見
於二月十六日全行抵省定於二十等日分作三起由湘江水路
取道湖北前進等語辦理尙屬妥速卽著楊岳斌親督各軍迅速
赴甘將該省滋事各匪次第掃蕩以靖邊陲據該督奏稱勇丁僅
止五千尙不足原奏八千之數兵貴精練不在數之多寡惟當勤
加教練卽可足資勦辦楊岳斌久諳軍事諒能剋期底定以慰朝
廷西顧之憂另片奏接據曾國藩函稱東征局因金陵撤散勇丁

回湘籌還欠餉俟補足後擬於本年端節前停撤見在甘省需餉浩繁請改爲西征局一切章程照舊辦理俟撤勇欠餉補清全歸楊岳斌軍營以作西征軍士之費並請飭下曾國藩等遵照辦理等語東征局每年抽收釐金約計七八十萬兩之多東南見雖平定而西北軍務方殷楊岳斌抵甘後都興阿穆圖善等軍卽須出關勦辦需餉均甚緊急若將此項釐金移作西征之用則楊岳斌等之軍旣克飽騰而征勦關外之餉亦可藉資轉運於軍務大有裨益官文曾國藩李瀚章素顧大局卽著按照所奏各節斟酌情形妥籌辦理迅速具奏李瀚章未到任以前著石贊清認真籌辦將此由六百里諭知官文曾國藩楊岳斌李瀚章並傳諭石贊清知之○諭李雲麟奏西路梗塞擬改道出口並懇赴京請訓各摺片見在新疆軍務緊要正需人孔亟之際李雲麟旣簡授庫爾喀

喇烏蘇領隊大臣自應迅赴新任效力戎行陝甘路旣未通卽可
改由北路行走以期迅速其口外應用勘合烏拉票等本日業經
諭令兵部等衙門迅速頒給矣李雲麟接到後著卽剋日啟行毋
稍延緩片奏內稱赴京請訓兼陳兵機緩急等語該領隊大臣如
果於軍事機宜確有所見不妨隨時具摺陳奏以備採擇毋庸來
京面陳李雲麟係棄取錄用之員惟當努力前進奮志立功以副
委任不可徒事侈談毫無實際再蹈前轍也將此諭令知之○予
福建陣亡總兵官賀國珍知縣沈田玉副將尹定友等祭葬世職
均附祀張運蘭祠○己亥諭議政王軍機大臣等林鴻年奏會籌
進勦事宜並滇省軍務不宜再緩請飭趙煥聯赴滇提篆擬難帶
往各摺片滇黔兩省軍務均關緊要見在迤東渠魁授首官兵正
宜乘此機會專攻迤西回目楊振鵬擅攻臨安馬如龍等權勢日

張亦宜分別勦辦裁抑林鴻年自宜速集兵勇進紮昭通籌辦軍務以資控制並著駱秉章遵照前奉諭旨於劉嶽昭唐友耕等所部酌量抽撥數營交林鴻年帶往滇省所需餉銀亦由駱秉章酌量緩急撥解以顧大局見在階州城池克復在即唐友耕俟階州克復後卽著駱秉章飭令該提督統率全部移赴滇省屆時林鴻年卽可將雲南提督印信交唐友耕接收臬司趙煥聯已諭令李瀚章等催令赴滇道員黃冕業經告病回籍應毋庸議前經諭令勞崇光由黔赴滇著卽懷遵前旨迅往迤東擇要駐紮與林鴻年會商軍務相機辦理毋得遷延觀望致誤戎機將此由六百里各諭令知之○諭林鴻年奏雲南軍務緊要進兵不宜再緩惟餉需無出不得不作哀多益寡之計見在東南軍務漸定東征局餉銀可望騰那接濟請飭該省每月撥銀三萬兩合之前撥湖廣釐金

每月可得五萬兩之數庶軍務藉得 手等語昨因楊岳斌奏甘
省需餉浩繁請將東征局改爲西征局藉資接濟當經諭令官文
等斟酌妥辦此時滇中軍務未平紀綱廢弛非有督撫大員帶兵
入滇相機勦撫不足挽回全局林鴻年見擬進紮昭東保全完善
以期節節進剿第餉項支絀寔後跋前仍恐於事無益官文曾國
藩等素顧大局務當與吳昌壽李瀚章等各就本省情形於撥解
西征餉銀外每月可以協解滇餉若干酌定數目迅速奏明辦理
一面知照林鴻年源源解濟不得推諉不行亦不得遲延不解致
誤要需滇省地極險遠逆匪鴟張若非鉅餉贍軍必致中途坐困
該督撫等務當同心協力共襄斯舉俾得戡定邊隅出斯民於水
火李瀚章未到任以前卽著石贊清實力籌畫次第撥解毋得稍
分畛域林鴻年另片奏請飭臬司趙煥聯赴任等語雲南臬司趙

煥聯係熟嫻軍務之員亟應趕緊赴滇經理軍事著李瀚章石贊清飭令趙煥聯迅赴林鴻年軍營聽候差委不准藉詞逗留將此由五百里諭知官文曾國藩吳昌壽李瀚章並傳諭石贊清知之○展五城煮賑兩月○加賞普濟堂功德林賑米二百石仍展期兩月○庚子以籌運甯夏糧餉賞鄂爾多斯貝子扎那濟爾迪貝勒銜○辛丑諭議政王軍機大臣等前據張之萬奏賊由郟城上蔡遂平交界之五溝營等處南竄至汝甯城東有由信陽竄楚之說當經諭令僧格林沁督隊跟追吳昌壽帶兵出省防剿近日賊勢若何久未據僧格林沁等奏報此股賊匪究竟能否就地殲除抑已竄越楚皖著僧格林沁激勵各軍穩慎進攻詹啟綸一軍諒已早到汝甯見在軍勢賊情該親王務當迅速馳奏以慰厯繫賊眾駭駭南竄吳昌壽當懷遵二月十九日寄諭剋期帶兵出省進

至豫境察看賊勢兇勦並著督令成大吉等一併出境會勦以收夾擊之功官文於省城防守事宜務須妥爲經理並嚴飭水陸諸軍聽吳昌壽節制不得稍有牽掣致誤戎機劉銘傳一軍多係淮勇皖勇精銳之師利於馳擊是否仍紮三河尖地方見旣不令赴閩卽當責令勦滅此股捻逆著曾國藩李鴻章傳知該提督整頓隊伍如賊近皖境卽令其實力勦洗如賊在楚豫卽檄令越境迎勦聽候僧格林沁調遣僧格林沁之兵轉戰經年疲勞過甚正宜駐於平原曠野地方蓄養銳氣凡山徑崎嶇藪澤低窪處所斷不可再行冒險前進且該大臣但須指揮調度使各路將士合力進勦賊股卽可殄滅亦豈可身臨前敵致蹈危機張之萬於省城防守及地方應辦事宜諒已布置妥協並著探悉汝防軍情隨時奏報以聞將此由六百里各諭令知之○諭恩麟等奏搜捕靖遠回

匪撥兵分路防剿蕭河城回民乞降各摺靖遠餘賊竄踞郭城驛等處經陶茂林督飭官軍分路進剿將郭城驛附近踞匪搜除殆盡焚毀中灘賊巢攻克李家原進取小白草原殲匪甚眾生擒悍賊馬福兒等數十名訊明正法剿辦尙爲迅速靖遠新城堡會甯王家集處處有賊盤踞陶茂林等酌留三營扼紮金縣以顧東路派黃超羣一軍防堵平番要路以通省西咽喉兼防河狄該提督卽由靖會一帶進剿所籌均尙周妥卽著陶茂林親督各軍將新城堡等處賊匪節節進剿掃蕩而前迅殲醜類固原餘逆恐蔓延會甯等處曹克忠見在整隊西行應如何進剿之處著雷正綰陶茂林懷遵前旨妥籌調度蕭河城回眾乞降旣據恩麟奏稱蘇上達本係王大桂舊部赫明堂亦是上次隨同張保龍投順之人或誠心向善亦未可知等語卽著恩麟督飭曹克忠嚴密防範妥

爲辦理毋得掉以輕心致爲該逆所紿曹克忠一軍本未令其赴
陝著恩麟咨會該總兵實力勦辦迅殄回氛廓清甘境陶茂林曹
克忠自入陝以來勇往殺賊疊著戰功朝廷深資倚任一俟至甘
肅清定當再加懋賞將此由六百里諭知雷正綰並傳諭陶茂林
恩麟知之○飭四川山東河南陝西各月撥銀四五萬兩備新疆
軍餉○壬寅諭軍機大臣等本日據雷正綰奏請將已革知府袁
懷忠開復永不敘用仍畱革職處分已明降諭旨不准開復永不
敘用矣此次克復蓮花城賊巢等處雖著戰功深恐畱營日久故
智復萌未免有妨營務卽著雷正綰將袁懷忠迅卽驅逐出營不
准逗畱該革員所部兵勇數百名著雷正綰另行遴派員弁妥爲
管帶雷正綰於克復固原以後由李旺堡同心城一帶節節進勦
見在想已統兵前進卽著仍遵前旨穩慎進取與都興阿等會攻

甯靈廓清邊圉毋稍延緩見在甘省各路官兵進剿情形著雷正綰隨時馳奏以聞將此由六百里諭令知之○諭各直省命盜案件悉遵定限訊結毋任延宕○予甘肅被戕典史劉芳並陣亡參將楊宗德等祭葬世職○命恭親王毋庸在軍機處議政並撤一切差使○癸卯諭軍機大臣等本日據張之萬奏賊竄信陽並賊復折竄北向見籌布置各摺片官文等奏吳昌壽督兵出省一摺賊由正羅各屬南竄經兵勇民團追剿堵截徑向北竄經陳國瑞追擊於碓山城東大獲勝仗此次張之萬奏陳國瑞帶兵攻剿殺賊二千有奇奪馬二三百匹係逃出難民供稱尙未接僧格林沁咨會如果屬實自係甚爲得力陳國瑞見在所部究有若干兵勇及出力戰狀僧格林沁查明即可奏請恩施以示獎勵而資鼓舞賊由遂平西平等處擾及鄆城日向北趨僧格林沁傳令各隊跟

追不得繞出賊前由北遏截自係因北面地勢平曠馬隊得以馳
聘易於奏功惟北地空虛而賊蹤飄忽如地近平原仍須檄飭各
路進兵繞前遏截以杜北竄汴省無兵可撥省垣以南各州縣卽
著張之萬嚴檄該牧令布置城守督飭各屬認真團練爲堅壁清
野之計一面將省城防守事務速行籌辦黃河緊要渡口亦當迅
籌防守毋稍疏虞河北一帶團防事宜著張之萬責成各該州縣
迅速興辦所有鎮道等防守要隘兵勇並著嚴飭備齊不至臨期
貽誤是爲至要直東一帶交界地方前經各該督撫遵旨派有兵
勇防守仍著僧格林沁偵探賊情隨時迅速知照各該省飭令帶
兵將弁迎頭截擊萬不可令其竄入直東境內致逆勢益形滋蔓
官文等所奏水陸防堵情形布置尙爲嚴密此時賊已北趨吳昌
壽駐紮黃州距賊較遠著卽督率楚軍越境追至豫疆如賊匪折

向南趨亦可迎頭截剿並著官文籌畫餉需源源接濟所有楚北各軍卽著統歸吳昌壽調遣吳昌壽抵豫後卽著隨同僧格林沁合力攻剿聽候進止機宜不得稍分畛域所有楚邊防務仍著官文吳昌壽嚴密防堵毋任賊蹤復行竄入將此由六百里各諭令知之○諭官文奏提督鮑超到鄂起程回川籌辦西征事宜一摺前因新疆回氛日熾疊經諭令鮑超整隊出關該提督見已由鄂赴川料理葬親事畢卽可部署起程惟派員分赴北口廣東採買馬匹洋槍等項並回川招募勇丁需費甚鉅著駱秉章先行籌款撥濟俾得及早成行不得藉詞推諉至鮑超一軍啟行後每月所需餉項前經諭令湖北等省督撫酌定數目奏明撥解僅據沈桂芬奏撥地丁銀十萬兩陸續批解其餘尙無確數將來全軍西行若非籌定月餉源源接濟必致貽誤軍行楊岳斌前請以東征局

燿金移作西征之用業經諭令官文等斟酌籌辦仍著官文俟楊岳斌抵鄂後與之熟商應如何酌量分撥俾鮑超一軍得此有著之款庶期士飽馬騰剿辦不至棘手官文楊岳斌素顧大局諒必能妥籌辦理也甘肅自固原克復後雷正綰陶茂林等軍分投進剿軍威甚振鮑超抵甘後如果出關之路已通即可徑赴哈密剋期進剿以期迅殄逆氛不必俟甘省全行肅清再行前進致關外望援孔亟也鮑超回籍以後所有籌備西征一切情形並准其專摺奏報該提督當奮勉圖功以副委任將此由五百里諭知官文駱秉章楊岳斌並傳諭鮑超知之○諭瑞雲奏涼州郡城內外逆回變亂剿除淨盡一摺涼州回匪結連營中回眾謀逆焚燒關廂攻撲郡城經瑞雲督飭涼州滿漢文武員弁及紳民團勇人等協力截剿剷除殆盡辦理尙屬周妥前據恩麟奏平番撲城回匪擊

勦漸退城圍稍解大股仍在城外十里二十里地方盤踞當經諭令陶茂林馳赴秦王川會同恩麟所派之宣威等營合力進勦平番距涼州並不甚遠設賊匪被擊北竄涼州郡城居回甚眾入伍食糧亦多回兵設再勾結煽亂關繫非輕著瑞雲仍飭派出兵勇搜捕餘匪以淨根株並令在事文武將回眾回兵妥爲撫輯彈壓毋令滋生事端其平番一帶賊匪著恩麟陶茂林懷遵前旨嚴飭兵勇迅圖掃蕩以期早日蒞事毋任蔓延將此由六百里諭知瑞雲並傳諭恩麟陶茂林知之○予河南陣亡遊擊胡得勝等祭葬世職○甲辰諭軍機大臣等駱秉章奏遵覆鮑超回川募勇所需經費川省無款可籌一招昨據官文奏鮑超業已抵鄂起程回川見派員分赴北口廣東採買馬匹洋槍等項並回川募勇需費甚鉅曾諭令駱秉章先行籌款撥濟茲覽該督所奏川省庫款本屬

入不敷出見在攻勦階州月餉及此後尙須籌辦滇黔之事餉源
既絀出款愈多鮑超募勇經費專恃川省籌解實屬無款可籌等
語自係實在情形伊犁軍事望援孔迫鮑超一軍自不能俟甘省
肅清始行出關該提督所部一萬餘人將來甘肅稍鬆尙可於在
甘勦賊兵勇內就近分撥出關駱秉章自可無庸再行撥兵助勦
其月餉業已於東征局籌畫諒官文等亦必能妥籌協濟惟該提
督募勇經費及採買馬匹洋槍等項需費甚繁駱秉章自當勉力
籌濟以期及早成軍剋日啟行解關外倒懸之厄該督素顧大局
諒能不分畛域著仍遵本月初八日寄諭將鮑超一軍所需軍裝
器械及一應購買馬匹之需安速籌款俾利遄行其鶴齡所帶川
勇前已諭知都興阿飭令出關改赴哈密防勦矣將此由五百里
諭令知之○乙巳諭內閣此次庶吉士散館著用策論考試○諭

軍機大臣等閻敬銘奏豫匪突入東境調兵迎剿並布置情形一摺前日據張之萬奏稱賊由遂平西平等處繞及郟城日向北趨當以北路空虚賊蹤飄忽諭令僧格林沁繞前截擊何以數日之間曹州單縣定陶城武荷澤郟城鉅野金鄉濟甯均有騎馬賊匪蔓延或數十人或一二百人不等東境既有防兵何以任令闖入漫無準備僧格林沁不肯截其北竄之路致令擾及完善措置殊未合宜著僧格林沁卽行統領馬隊追剿嚴扼北犯之路會合山東防兵將曹濟各屬馬賊一律削平無任再肆延蔓丁寶楨已派參將宋延德先往截擊該藩司旣在曹單交界之青堦集居中駐紮卽著閻敬銘飭令趕緊調派兵弁認真剿捕該撫以丁寶楨勇隊無多慮其不敷分布已飛調總兵保德帶領前挑兵一千名追擊並調范正坦等帶兵前往濟甯東平等處剿辦均著嚴飭該總

兵等實力勦洗省城防務並須

爲布置毋稍大意直隸東明長

垣一帶與曹考接壤劉長佑前次備調之各起兵勇著卽調赴大名等處嚴爲防備如須出省布置並著酌度情形妥爲辦理直隸見存馬步共有若干名數遇便奏聞僧格林沁帶兵北向著吳昌壽遵照疊次諭旨帶兵直抵豫境爲僧格林沁接替之軍迅將豫省餘匪奮力勦除不得稍分畛域此股賊匪飄忽而來究係何處股匪是否有宋憬詩在內著僧格林沁閭敬銘查明具奏張之萬與吳昌壽到豫時飭令各營兵勇聽候調遣兼令各州縣整飭團練同心滅賊並嚴飭河北鎮道加意嚴密防守以靖地方汴省防務仍著妥籌辦理毋稍疏懈將此由六百里加緊各諭令知之○諭沈葆楨奏閩賊去江日遠交卸起程回籍一摺沈葆楨前以福建漳逆竄至白沙於給假之後仍暫緩起程見因白沙之賊歸併

漳郡直趨海隅去江甚遠該撫已於三月初一日交卸由江起程並令婁雲慶統所部由會昌前進武平劉勝祥移紮瑞金賴南防務責成席寶田會商各軍相機辦理如逆蹤回竄該撫仍擬星馳回江足見體國公忠能顧大局惟江省兵燹之餘一切軍事吏治刻刻需人整理如軍情稍緊該撫固須迅卽回江卽閩省逆勢日衰無虞回竄亦當無庸拘泥假滿早行回任以慰馳廛另摺奏參剋扣勇糧之寔營大員請旨懲辦等語鮑超所部霆營見在料理西征而該營分統之記名提督譚勝達總兵周有勝竟敢將所發餉銀捏開名目多方剋扣以致合營鼓譟幾成大變本當按照軍法立置重典惟據該撫奏稱該員等均身經百戰屢著奇功從寬暫允所請記名提督譚勝達提督銜記名總兵周有勝均著一併革職發往鮑超軍營效力贖罪並著該撫咨行鮑超如該革員等

到營後仍萌故態或不得力卽行按照軍法從事毋稍姑息記名提督直隸宣化鎮總兵宋國永失於覺察咎亦難辭仍著交部照例議處其霆營弁勇爲首滋事之人著飭宋國永不動聲色密行拏辦以儆刁風該撫密陳片一件已交軍機處存記將此由五百里諭令知之○諭明緒奏請調東省勁旅出關剿賊錫霖等奏遵旨籌防暨錫霖奏因病懇請開缺一摺見在吉林等處存防兵數無多勢難再行抽調應毋庸議伊犁各城待援甚急前經疊諭穆圖善俟甯夏軍務稍鬆卽行統軍出關並經都興阿等派署肅州鎮總兵德祥帶兵一千名前赴哈密其川省派援之鶴齡一軍亦經諭令改往哈密一帶防剿此時計均可出關著明緒飛檄德祥等軍迅將哈密等處回匪剿除卽可直達庫爾喀喇烏蘇漸次西下明緒仍當激勵存城兵勇妥籌防剿以待援兵並隨時偵探

巴燕岱城防情形妥爲兼顧塔城防務亦關緊要錫霖輒以舊疾復發懇請開缺回旗顯係意存諉卸錫霖著卽開塔爾巴哈台參贊大臣之缺由明緒調赴伊犁聽候差委不准藉故遷延所遺塔爾巴哈台參贊大臣著武隆額馳往署理塔地車排子地方人民慌亂土爾扈特相近之海沿一帶並有遺勇數百名肆行滋擾綏來縣回匪亦竄至大小拐一帶距塔城不過百餘里錫霖派令委營長穆隆阿會同台吉特古斯蒙古官兵嚴密防守卽著武隆額迅赴塔城札飭派出各軍慎防要隘錫霖札飭就近住牧之哈薩克台吉挑選阿勒巴圖數千名備調爲數太多著卽妥籌鎮壓毋任境外匪徒勾結滋事塔城回眾向稱良善武隆額到署任後卽督飭署參將米慶等妥爲撫輯曉諭回眾毋爲浮言所搖伊城帶兵需員博勒果素已於上年十二月調任伊犁領隊著俟武隆額

到塔後酌帶兵練馳赴伊垣會同明緒相機進剿塔爾巴哈台領隊大臣印務卽交圖庫爾接辦將此由六百里各諭令知之○丙午諭內閣前據左宗棠奏查明已革浙江按察使李元度參款當降旨交刑部分別情罪定擬具奏嗣據該部議定罪名請將該革員發軍臺效力贖罪亦經降旨照准茲據沈葆楨李鴻章奏稱李元度後此雖有可議之罪前此究有不可掩之功將該革員事蹟臚列呈覽並聲稱李元度之母撫孤守節年已七旬家無次子情實可憫懇請免其發遣等語著刑部再行覈議具奏○諭前因御史陳廷經奏參湖北布政使厲雲官聲名狼藉巧於逢迎各款當經諭令官文等嚴查參辦茲據官文吳昌壽奏稱查明厲雲官性情耿介不避嫌怨並非善於逢迎此案既經該督等查明均無其事著毋庸議官文等請飭該員補行回籍守制之處著照所請厲

雲官卽著開缺回籍守制並官文等飭令該員將經手事件趕緊清釐以便迅速起程○江蘇巡撫李鴻章奏郭松林等援閩之軍應由廈門進兵得旨卽著密飭於到廈後察酌賊勢進取先截其窺伺海濱之路如賊股竄粵卽著奮力跟追與粵師會攻以收夾擊之效潮州一帶該撫卽咨明廣東督撫厚集兵力水陸嚴防以期有備無患○丁未欽奉 慈安皇太后 慈禧皇太后懿旨所有皇帝讀書課程及弘德殿一切事務均著醇親王總司稽查用昭慎重○以何璟爲湖北布政使由安徽按察使遷○戊申僧格林沁奏查髮捻各逆前出臨潁鄆城一路向南奔突臣令張曜宋慶郭寶昌跟蹤尾追並令副都統倭和總兵陳國瑞由扶溝商水繼進嗣探該逆有竄往上蔡之勢惟恐再竄楚疆擾及完善因飛咨官文扼要布置一面札飭提督成大吉姜玉順卽赴九里關外西自黃

坡站七里坪東至界嶺等處嚴密扼防旋探該逆竄至汝甯有攻
毀民寨情事更恐煽惑伏莽又肆鴟張遂於二月初五日飭營總
何建勳取道商水先往堵禦臣僧格林沁卽於初八日親督馬隊
自鄆陵啟程前進並商令臣國瑞暫紮許州以爲後路聲援十一
日臣行抵汝甯偵知逆眾由息縣以北向東南奔突臣札調總兵
詹啟綸迅赴三河尖會同藩司英翰實力堵截以扼入皖之路十
四日臣追至息縣屬之陡溝該逆連夜竄入羅山境內十六日我
軍馳至羅山西南之張家店已繞出賊前正可迎頭截剿而該逆
又向信陽一帶狂遁十八日在中山鋪等處經郭寶昌等追及賊
尾小有斬擒逆眾復西竄信陽以東三河一帶十九日翼長成保
常星阿張曜不慶會合郭寶昌行至十八里廟賊眾由山口衝出
郭寶昌等奮力迎擊自已至申斃賊數百名二十日臣至信陽該

逆已折而北竄復由二十里河向西北奔逸臣卽催調陳國瑞等自陡溝探蹤西進二十四日臣至確山適陳國瑞等軍亦到該逆大股約有萬餘在確山迤東數里列隊屯聚臣當派翼長全順管帶馬隊與陳國瑞部隊由西面進何建鰲倭和帶領參將施紹恆等由西南進以常星阿所部馬隊助之並令成保帶領黃旗馬隊在南面依山列仗以郭寶昌之軍伏於山口總兵張曜宋慶等在後策應布置甫定臣在嶺督陣逆眾旋即擁擁前來直撲西面凶猛異常陳國瑞鏖戰時許步賊已怯而馬賊猶拌命死鬪正相持間郭寶昌由山口突出將馬賊衝斷何建鰲倭和隨後接應全順常星阿亦各帶馬隊直前衝壓逆勢不支紛紛敗退我軍追殺十餘里屍橫徧野追至小橋地方逆眾復敢回拒我軍又極力奮擊賊向東北竄遁是役計斃悍賊三千餘名奪獲旗幟刀矛不計

其數逆眾遺棄輜重甚多救出難民及逃散者不下數千人據獲賊供稱是日係逆首賴汶洗任化榜牛洛紅張總愚厚大濬等各股悍黨合力死戰受創後賊竄者僅係馬賊其步賊已所餘無幾該逆見由遂平西平郟城鄆陵許州扶溝各境直走睢州三月初一日臣追至睢州以北據探該逆由李八集竄過黃河老隄圖擾東境當飭藩司英翰總兵詹啟綸由潁毫歸德虞城一路向單縣進發初四日臣追至曹縣西北該逆仍向東北竄突恐其偷渡運河復飛咨撫臣閻敬銘並札兗州鎮垣分投嚴防又慮該逆不渡運河必將回竄豫疆遂令總兵張曜不慶等卽在虞城一帶扼紮俾資防剿臣連日自定陶城武嘉祥鉅野等境於初七日追於汶上縣之馬家海地方而該逆行走甚速晝夜無停竟於是日由開河地方渡過運河初九日竄至甯陽折而東南臣見已督軍追至

曲阜縣西北此股逆匪形同流寇一味狂奔我軍馳追而月每日均在百里以外往返不下三千餘里未敢稍息步隊奔馳既久業已節節落後擬稍待兵勇到齊即當相機追剿查確山之戰陳國瑞勇隊打仗最爲奮勉郭寶昌勇隊同時進剿亦極出力是以每營賞給銀五千兩何建德所部勇隊奮力接應亦賞銀三千兩已飭糧臺照數給發其陳國瑞郭寶昌之帶隊員弁均屬勇往未便沒其微勞謹另繕清單懇請獎勵出自 天恩 上諭軍機大臣等據僧格林沁等奏稱追剿髮捻各逆獲勝敗匪由豫入東緊蹙進剿各摺片此據賊匪勢同流寇官軍追剿而月上下往返馳逐幾及三千里各營將士均形勞苦惟步兵逐日邁行足無停趾疲乏異常該親王於步隊兵勇到齊後須令暫爲休息再行進兵方不至有前突後竭之虞賊蹤剽疾此等被竄是其慣技著該親王

檄令各營及東省官軍分路布置於逆匪圖竄之路豫爲扼要駐紮庶四面兜埵易於殄滅若一味跟踫官軍處處俱落賊後恐該逆任意蔓延將成不了之局僧格林沁韜略素嫻諒能謀定後戰迅殄逆氛也陳國瑞打仗奮勇該親王已將陳國瑞郭寶昌兩軍各賞銀五千兩何建龍等所部賞銀三千兩所辦甚是惟該親王所部馬隊晝夜奔馳不辭勞瘁亟應量加鼓勵亦著賞給銀五千兩卽由山東藩庫發給其馬隊出力各員弁並著隨時保奏候旨施恩閣敬銘飛檄東省官軍會同僧格林沁所部各營協力勦洗務將此股就地殲除毋任再行肆擾賊匪大股雖趨東境而豫省匪蹤尙未淨盡著吳昌壽懷遵前旨迅赴豫疆實力勦辦該省餘匪卽責成吳昌壽迅速掃除不得稍分畛域張之萬仍一面查明何路尙有伏莽飭屬認真搜捕同心殺賊以期次第廓清直隸東

明長垣一帶毗連曹考難保該匪不由東竄直劉長佑前次備調之各起兵勇是否已抵大名等處應否出省布置均著妥籌辦理並將防守情形隨時奏報以聞曹州濟甯之匪經僧格林沁大兵跟剿恐其竄入徐州一帶著彭玉麟迅速赴任督飭官軍嚴密防守毋令擾及皖區彭玉麟未到任以前卽著吳棠分路布置妥爲辦理僧格林沁另片奏郭寶昌打仗勇往請旨遇缺簡放等語已諭令軍機處存記惟陳國瑞打仗素稱得力確山之戰據奏最爲奮勉亦應量予恩施並著該親王隨時察看酌量保奏俾資鼓舞將此由六百里各諭令知之○諭惠慶奏古城被圍日久請飭官兵趕緊赴援一摺逆回糾眾攻撲古城勢甚鴟張經官兵出力拒擊殺賊無算賊鋒始卻該城被困日久亟望官軍救援旋探聞色普詩新帶領滿漢兵勇二百餘員名由奇台行抵富家莊地方遇

賊接仗因寡不敵眾先勝後挫色普詩新及帶兵員一時傷亡全軍俱潰古城兵食將竭勢甚岌岌都興阿等所派署肅州鎮總兵德祥所部兵一千二百餘名見已行抵哈密著都興阿穆圖善飛檄德祥統帶官兵相機前進鶴齡一軍並著都興阿等飛催出關與德祥之軍聯絡進剿都興阿等當嚴飭德祥鶴齡等隨時審度軍情穩慎進取萬不可稍有挫失致損軍威刻下甘肅雷正綰等軍已諭令由李旺堡同心城一帶與都興阿等會攻甯靈計可聲息相通回環策應剋期蕝事古城援兵尙形單薄穆圖善一時未能出關如各軍中尙有可以抽撥之兵卽由都興阿穆圖善先行派往助剿以資厚集扎克當阿伯錫爾因哈密防務緊要招募民勇一千餘名訓練協剿著仍懷遵前旨認真揀擇訓練成軍協同在城防兵與巴里坤官兵聯爲一氣互相援應哈城兵勇見既

募集千餘合之鶴齡德祥兩軍諒敷分布自應設法救援古城惟古城逆氛甚熾赴援兵力亦須稍厚若僅以數百人前往則寡不敵眾於事無濟哈城爲進兵之路防守亦關緊要除將各軍分撥畱防外其餘酌量調赴古城應援兼須妥籌後路接應之兵以免疏失卽著扎克當阿伯錫爾妥籌辦理惠慶惟當激勵存城兵勇固守待援毋稍疏懈並著飭奇台縣知縣恆頤等多籌糧糈妥運到城以濟軍食甘肅省城見有陶茂林勁旅本省之兵如可騰出卽著恩麟移緩就急酌撥若干飭赴哈密以厚兵力將此由六百里諭知都與阿圖善扎克當阿伯錫爾惠慶並傳諭恩麟知之○以李宗義爲安徽按察使由署兩淮鹽運使遷○予古城陣亡署巴里坤領隊大臣吐魯番領隊大臣色普詩新祭葬世職如都統例諡武愍佐領惠斌等祭葬世職○己酉左宗棠徐宗幹奏劉典王德榜

王開琳張恆祥等由汀連進剿南陽汪海洋老巢疊次獲勝賊勢日蹙劉典料賊竄必速二月初三日派楊芳桂張福齊會同王德榜所部戴奉聘等馳赴中村截擊初四夜間南陽之賊果棄巢竄走知縣陳鴻藻等由亨子嶺殺入斃賊數百名初五日楊芳桂等追至上杭所轄舊縣又殺斃數百名劉典慮賊由龍巖內竄當飭李耀南等於初六日進紮華家亭適賊由舊縣竄踞白沙我軍分路夾擊殺賊五六百名生擒百餘名初七日劉典會同王德榜進剿白沙張福集等率所部猛進殺賊三四百名賊退里許仍拌命回闕後路之賊亦鱗擁而來郭慶雲怒馬衝入賊陣直取汪逆中槍陣亡官軍因之稍卻適王德榜將李塘伏賊擊賊乘勢追過田隴親督何秀清等鈔出賊後康國器由龍巖飭所部營官羅洪標等同時馳至合力衝殺賊遂大奔官軍追殺十數里始還是役共

計斃賊數千名生擒數百名拔出難名無算王開琳一軍聞南陽賊竄亦分路疾追甫抵茶樹下悍賊四五千來撲王開琳督各營力戰殺賊三四百名初六日復躡蹤追擊逆賊且戰且退遂向永定縣屬坎市竄去汀州連城境內肅清其劉明珍趙均由漳平進紮去路永福里將和溪踞逆擊敗後二月初三日進攻板場後壩賊卡破之殺賊五六十名初四日和溪之賊糾添水潮悍賊數千來撲劉明珍趙均派隊馳往策應而自率所部繞攻和溪梁友武破卡直入斃賊數百名餘匪紛紛潰竄立將和溪賊壘掃蕩初五日乘勢進攻水潮逆匪丁汰洋率眾數千抗拒劉明珍等督隊奮擊賊急棄水潮而遁計兩日共斃賊千餘名拔出難民無數竊汪海洋經官軍痛剿圖擾江西因江西兵力厚集不能竄越又侍逆已爲高連陞所敗漳逆呼援甚急圖與汪逆合股漳逆於正月二

十日分黨窺犯漳浦二十一日竄陷縣城見復遣黨屯踞南路官田嶺廟前一帶以竄石碼並嗾龍巖敗逆由北路圖犯長泰臣左宗棠於南陽逆賊未竄之先已飭張恆祥一軍移紮漳平劉清亮一軍由同安相機前進見在高連陞黃少春分駐石碼以扼北溪而南陽肅清後王德榜已赴龍巖劉典亦馳赴漳平漳州西北一帶以刻下局勢論之北路應嚴扼華對司朝天嶺諸隘由和溪水潮進勦南靖南路應嚴扼石碼進窺漳浦李鴻章所派郭松林楊鼎勳兩軍由上海赴閩臣等會商擬俟兩軍至廈卽由海澄進取漳浦先斷其入海之路然後由九龍嶺木棉菴會攻漳城並杜其竄粵之路其王開琳所部已飭移紮永定河邊兼顧上杭以扼其奔竄江西能將汪海洋李侍賢兩大股於閩境殲除則丁汰洋林政揚等賊亦無能爲矣至婁雲慶接統鮑超所部整理未曾就緒

並未入閩見在賊既趨併南靖漳州汀防稍鬆即可仍留江境臣

左宗棠擬俟劉典抵漳平後將北路軍事布置稍定再行進省籌

辦一切如須赴泉州同安督剿再當出省辦理、上諭軍機大臣

等左宗棠等奏官軍追剿獲勝汀連肅清劉明珍等由漳平南路

進剿和溪掃蕩賊壘乘勢進攻水潮丁逆棄水潮而遁侍逆爲高

連陞所敗呼援甚急圖與汪逆合股漳州踞逆竄陷漳浦見復遣

黨屯踞南路官田顏厝前一帶以窺石碼並喉龍巖敗逆由北路

圖犯長泰左宗棠已飭張恆祥一軍移紮漳平劉清亮一軍由同

安相機前進高連陞等分軍駐石碼扼北溪王德榜已赴龍巖劉

典亦馳赴漳平漳州一帶布置均尙周密逆勢見已窮蹙惟當防

其就近入海勾結洋盜各處竄擾郭松林等計可由滬抵閩著左

宗棠徐宗幹卽飛飭由海澄進取漳浦斷其入海之路吳全美已

募紅單拖罾等船赴閩著飭令嚴扼海口遇賊卽擊毋稍疏懈該督撫務當檄飭南北兩路見取南靖漳浦將汪李等逆就地殲除毋任再行紛竄該逆飛走技窮必將拌死山竄廣東江西邊境以圖一逞著瑞麟郭嵩燾飭令李福泰等軍嚴防潮州及埔饒等處方耀等軍已入閩者卽令歸左宗棠調遣儻粵邊有警仍令回顧沈葆楨已起程赴閩孫長紱責無旁貸當督飭前派防軍嚴扼本境如被闖入完善惟該署督撫等是問婁雲慶接統鮑超所部既未入閩卽著仍畱江境協同防守俟此股賊平仍遵前旨馳赴鮑超軍營隨同出關剿賊左宗棠俟劉興到後布置定妥再行進省辦理一切事宜將此由六百里諭知瑞麟左宗棠徐宗幹郭嵩燾並傳諭孫長紱知之○諭楊能格奏慶陽糧臺兵數日增請飭催協餉並將陶茂林軍餉解省支放一摺都興阿等兵數日增而協

餉寥寥解到者已盡支銷未解者杳無信息若不亟爲籌畫飢軍譁潰堪虞著駱秉章張之萬閻敬銘沈桂芬將協甘欠解之款各先籌撥銀十萬兩務於四月內解赴慶陽並著沈桂芬飭令河東道將欠解甲子綱鹽課趕緊批解一面將乙丑綱實力催徵源源報撥以維大局楊能格奏稱慶臺奇窘陶茂林一軍餉項請仍由陝省供支等語慶臺餉需缺乏陶茂林一軍無力支應亦係實情所有陶茂林軍餉卽著劉蓉竭力籌措每月應如何協濟之處奏明辦理前撥江海關海兩關及四川專餉卽由陶茂林咨催各該省督撫等趕緊報解並令徑解蘭州省城以備供支恩麟亦當隨時接濟毋令陶茂林一軍餉需缺乏致誤戎機陶茂林軍餉見在既不由慶臺供應若各省協款批解稍遲該提督軍餉勢必一無著落將士枵腹從事貽誤非輕陶茂林遇有餉項不繼之時仍著

楊能格妥爲兼顧不得因有此奏意存推諉置大局於不問另片奏糧臺欠餉甚鉅楊岳斌入甘部撥餉銀已有成議請飭該督自立糧臺等語楊岳斌後路糧臺已令李桓辦理卽著該督於安營處所就近自立糧臺以備收支其撥定該營餉銀卽著楊岳斌咨會各該省徑解該督糧臺各省欠餉由楊岳斌自行催提其蔣凝學入甘餉需卽由該督糧臺支放以清界限而專責成將此由六百里諭知駱秉章楊岳斌張之萬閻敬銘沈桂芬劉蓉並傳諭陶茂林恩麟楊能格知之○庚戌諭軍機大臣等本日據張之萬奏賊竄東境閻敬銘奏捻蹤東竄並據劉長佑奏調兵出省督辦及存營調出兵數各摺片覽奏均悉僧格林沁以馬隊追賊晝夜遄行三千餘里賊匪到處有馬可攜官軍無馬更換疲乏殊甚若再與盡力追逐勢必爲賊所乘務當穩慎進取飭令丁寶楨所帶之

勇分投布置嚴密扼截閭敬銘亦當懷遵前旨檄令東省各營處
處截勦並督飭團練固守鄉村毋任賊勢蔓延僧格林沁所帶步
隊亦須暫息數日再行追賊丁寶楨所部勇丁卽著歸僧格林沁
調遣合力攻勦張之萬見飭張曜宋慶等軍馳往虞城卽著聽候
僧格林沁調遣嚴密扼截毋任賊蹤回竄知府湯聘珍等軍張之
萬見已檄令北渡並檄河北鎮道調集營兵整頓團練務當督令
節節設防嚴密布置汴梁以南尙恐有另股敗匪續行北竄張之
萬亦當分兵豫防毋得顧此失彼劉長佑見已調兵定期出省擬
先駐廣平並令臬司李鶴年總辦營務自可得力仍須嚴扼濮范
沿河一帶毋令逆蹤偷渡一面與張之萬所派河北防兵聯絡聲
勢毋稍疏懈直隸各標兵丁仍著隨時訓練以備續行調遣此股
逆匪既有宋憬詩在內難保不復竄直東一帶熟路肆行滋擾臨

清州南北各州縣閭閻銘務當調派兵勇與直隸防兵互相援應嚴加防範吳棠彭玉麟仍當遵奉前次諭旨嚴扼邵宿一帶以防賊撲清江東犯裏下河之路本日復據官文吳昌壽奏稱湖北長陽匪黨接捕肅清一摺巨匪田世珮等雖經擒斬黨與殲除仍須留駐兵勇鎮壓毋任餘孽與豫捻勾結復行滋蔓吳昌壽當迅速帶兵馳赴豫省督率攻剿並將到豫日期馳奏毋稍觀望楚北邊境卽由官文分飭各軍扼守以防回竄至山西澤潞兩府與河北彰衛懷一帶處處毗連平定一路亦與直隸井陘獲鹿接壤沈桂芬當卽分派兵勇擇要扼守毋任賊蹤竄入是爲至要將此由六百里各諭令知之○諭恩麟奏涼州回匪變亂先後撲滅竄擾平番回匪擊敗回巢及古浪縣屬回匪滋事旋卽殲滅各摺片涼州府城關回匪勾結變亂前據瑞雲奏報業已剿滅淨盡回弁馬忠

亦經擊斃此次恩麟所奏探報各情與前奏大略相同惟據稱同
弁馬忠並在逃之百餘人尙未弋獲與瑞雲所奏剿滅淨盡情節
不同是否探報之誤仍著瑞雲恩麟查明有無餘匪迅速拏辦並
著恩麟飭令道員黎獻查明該匪懷疑變亂情由出示曉諭以安
反側其竄擾平番之匪於官軍剿敗之後分踞武勝堡等處經黎
獻會同副將張琮督軍剿敗退回米拉溝逆巢並將古浪縣屬馬
得彪一股匪徒立時埽蕩以免勾結之患辦理尙屬迅速卽著嚴
飭黎獻督同各路民團扼要防堵毋任蔓延爲害前諭陶茂林一
軍馳赴秦王川會剿平番逆匪並防該匪北竄涼州該提督前由
靖會一帶搜剿固原餘匪見在行抵何處能否分兵會合黎獻等
軍將米拉溝賊巢迅圖埽滅並嚴防該匪北竄涼州之處著恩麟
陶茂林妥籌辦理署安肅道恆齡接濟哈密軍食前已據扎克當

阿奏報尙能竭力籌措有裨軍務見在德祥及鶴齡各統所部出
關諒已先後行抵哈密並此外仍有續行出關之兵應用軍食卽
飭該署道寬爲籌備儻有不敷准其於近省協撥銀內酌量動撥
採買俾利軍行將此由六百里諭知瑞雲並傳諭陶茂林恩麟知
之○予湖北陣亡參將楊先疇等祭葬世職建祠○辛亥諭內閣
朕奉 慈禧皇太后 慈禧皇太后懿旨前據惇親王醇郡王降
調通政使王拯御史孫翼謀先後陳奏恭親王雖經獲咎尙可錄
用各摺當交王公大學士九卿翰詹科道會同詳議具奏茲據禮
親王世鐸等大學士倭仁等會議覆奏並據內閣學士殷兆鏞都
察院左副都御史潘祖蔭內閣侍讀學士王維珍給事中廣誠及
科道等聯銜各摺均以恭親王咎由自取惟係懿親重臣應否任
用予以自新候旨定奪等語所見大略相同惟給事中廣誠等摺

內所稱廟堂之上先啟猜嫌根本之間未能和協駭中外之觀聽
增宵旰之憂勞等語持論固屬正大而於朝廷辦理此事苦心究
未領會雖前日面諭軍機大臣等隨同孚郡王赴內閣傳諭諸臣
而科道等仍有此語實有不能不再行宣示者恭親王誼屬懿親
職兼輔弼在親王中倚任最隆恩眷極渥特因其信任親戚不能
破除情面平時於內廷召對多有不檢之處朝廷杜漸防微若復
隱忍含容恐因小節之不慎致誤軍國重事所關實非淺鮮且歷
觀史冊所載往往親貴重臣有因遇事優容不加責備卒至驕盈
矜誇鮮克有終者可爲前鑒日前將恭親王過失嚴旨宣示原冀
其經此次懲儆之後自必痛自斂抑不至再蹈愆尤此正小懲大
誡曲爲保全之意如果稍有猜嫌則悖親王等摺均可畱中又何
必交廷臣會議耶茲覽王公大學士等所奏僉以恭親王咎雖自

取尙可錄用與朝廷之意正相脗合見既明白宣示恭親王著卽加恩仍在內廷行走並管理總理各國衙門事務此後惟當益矢愼勤力圖報稱用副訓誨成全至意在廷臣工均爲國家倚任惟當同矢忠赤共濟時艱毋得因此稍存疑慮畏難苟安致蹈因循積習將此宣諭在廷臣工知之○諭前據倭仁等奏遵旨查訊翰林院編修蔡壽祺摺內緊要條件一摺據稱於本月初六日將蔡壽祺原摺內所稱挾重貲而內膺重任善夤緣而外任封疆之緊要二語傳到蔡壽祺面加訊問當據供稱薛煥劉蓉行賄夤緣係得自傳聞應否查辦伏候聖裁等語朝廷登進人才豈容納賄行私致滋物議薛煥劉蓉或內躋卿貳或外任封疆均係朝廷大臣如於蔡壽祺所參不行查辦何以重名節而振紀綱著薛煥劉蓉各將所指行賄夤緣一節據實明白回奏以憑查辦儻敢有

一字欺飾再經查出定行從嚴治罪○諭曾國藩奏請將龍江西
新兩關暫緩開設並撥款辦運一摺據稱江甯城外向設龍江西
新兩關咸豐三年以後關稅停徵近年在大勝關抽釐復在城中
添辦門釐因地方元氣過傷所收已屬無幾若遽撤卡設關徵收
斷難足額加以衙署開銷吏胥苛索恐所徵尙不能敵釐卡之數
請援照浙江成案無庸開關徵稅等語所奏切中地方利弊江甯
蹂躪日久商民疲困正宜休養生息以培元氣若開關既於國課
無益而關書巡役人等轉得肆意誅求勢將商民生畏裹足不前
於招集流亡之政殊有關礙著松瑞將龍江工關西新戶關均暫
緩設立俟商賈復業再由曾國藩奏請設關以復舊制並著照曾
國藩所擬先於江甯藩庫撥銀二萬兩解交織造爲購辦乙丑年
大運之需並於釐金項下按月提銀一千兩爲津貼該織造及所

屬各員養廉薪貲書吏匠役紙張飯食等項費用至江甯織造所辦年貢共需銀若干應由何款撥解據曾國藩奏稱因藩署文卷全失無案可稽著戶部內務府查明成案具奏尋奏遵查江甯織造成案其按年例款僅內務府有歲撥藩庫銀四萬三千三百餘兩歷年動用均有節省歲銷以三萬兩內外爲准至年貢向不作正開銷無案可稽應由該織造會同該督籌商辦理從之○諭軍機大臣等都興阿穆圖善奏移營進剿獲勝情形並請豫調馬隊一摺都興阿等軍進攻甯夏逐口出隊均有斬擒見在黃金山等已偪紫東門等處擊破賊卡挑挖長濠正當乘此聲勢將城賊聚而殲旃迅圖克復惟鹽靈中衛賊匪分股竄擾皆爲甯夏賊黨外援雖經都興阿等派兵防剿尤當相機妥籌兼顧庶免賊匪得以勾連又煩兵力鄜州宜君中部等處亦有賊匪滋擾雷正綰劉蓉

當分籌截勦毋令蔓延甯夏肅清後都興阿等卽須振旅出關惟所部馬隊無多難資勦辦常星阿等各起馬隊前經雷正綰奏調已諭令僧格林沁酌量調撥著僧格林沁斟酌情形一俟軍務稍鬆卽先將此項馬隊迅飭赴甘改歸都興阿軍營聽候調遣楊岳斌前已據奏起程卽著星速前進以便與都興阿等商辦一切事宜楊岳斌入陝時常星阿等如尙未抵甘著雷正綰劉蓉催令該副都統等督帶馬隊馳赴甯夏其訥依楞阿馬隊業經劉蓉飭赴都興阿軍營著卽催令前進鮑超告假回籍此時想可抵川著駱秉章迅催該提督趕緊部署入甘都興阿等出關後甯夏北路軍情或交鮑超接辦或卽由雷正綰兼顧屆時自可酌度辦理不至接替無人詹啟綸一軍見隨僧格林沁勦辦豫捻都興阿等請令該員迅赴甯夏之處著暫緩置議將此由六百里諭知僧格林沁

都興阿穆圖善雷正綰駱秉章劉蓉並傳諭鮑超知之○以籌辦甘肅營務奮勉賞已革安徽巡撫翁同書五品頂帶○諭劉長佑撥古北口官兵三百名赴甘肅助剿並按月撥解餉銀○壬子諭軍機大臣等昨據僧格林沁閻敬銘等各奏豫匪竄入東境蔓延曹濟等屬歷十數州縣而至曲阜僧格林沁見帶馬隊緊躡其後閻敬銘亦派丁寶楨帶領勇隊分投追擊此股賊匪由豫竄東勢極飄忽恐不能逞志於東必將竄擾徐邳一帶疊經諭令彭玉麟趕緊赴漕督新任辦理徐宿防務彭玉麟未到任以前仍由吳棠認真辦理惟徐宿等境與東省接壤地方甚屬空虛恐防兵不能得力難固藩籬著曾國藩速派得力兵將馳赴徐宿交彭玉麟等妥爲調遣如賊近江蘇邊界卽須出境會合山東官兵夾擊裏下河地方尤爲緊要並須妥爲防範毋令賊蹤闖入彭玉麟懇辭漕

督業經批令仍赴新任毋許固辭該大臣可就近切催令速到任
辦防以便吳棠早日入粵劉銘傳一軍見在何處能否分兵赴淮
東交界處所扼要並著妥籌調派署兩淮鹽運使李宗羲已經簡
任安徽按察使見當整飭離綱之際必須廉明練達有爲有守之
員方足以資整頓著曾國藩遴派妥員先往接署仍著酌保數員
候旨簡放總期操守謹嚴洞悉鹽務情形於興利除弊各事宜實
力舉行庶於國課民生兩有裨益本日簡授山東鄧州鎮之周惠
星見在是否在營著該大臣卽行催令赴任以重職守將此由六
部里諭令知之○癸丑諭內閣薛煥奏遵旨明白回奏請簡派大
臣認真查辦一摺著派肅親王華豐會同刑部都察院堂官秉公
查訊務須水落石出不准稍涉含糊胡原派查辦之大學士管理刑
部周祖培刑部左侍郎王發桂及軍機大臣都察院左都御史曹

毓琰刑部右侍郎恩麟都察院左副都御史恆恩俱著同避薛煥
蔡壽祺均著聽候傳質○諭前因張之萬請飭催蘆商捆運豫省
懸岸鹽斤當經諭令戶部速議具奏茲據該部奏稱上年四月間
劉長佑奏豫省懸岸僅有滑縣一處尙無商人認運其餘祥符等
縣引岸均已設法招徠該部卽以招辦情形查令詳細聲敘至今
未覆見張之萬奏豫省應銷蘆鹽引地尙有中牟等九處懸岸其
祥符等八縣雖經運司招認未據捆鹽到岸該督從前奏報各情
顯有不實不盡請旨飭查等語長蘆引岸招商承運接充均係運
司專責乃豫省懸岸先據張之萬奏請招商捆運而該督覆稱業
由長蘆一律招辦該督既不准豫省捆運蘆鹽自應責成該運司
認真經理何以祥符通許鄆城禹州密縣沈邱臨潁許州各岸於
奏明招運之後仍未捆鹽到岸其中牟新鄭淮甯商水項城太康

扶溝長葛汲縣九處均係懸岸又何以置若罔聞著劉長佑一面先行據實奏聞一面嚴飭該運司將中牟等九處懸岸一律招商捆運並督催祥符等八處各商迅速運鹽到岸毋再遲延儻仍有引岸虛懸藉詞搪塞著該督從嚴參辦如張之萬訪聞確鑿亦卽據實奏參毋分畛域尋奏查祥符等八縣均經運鹽前往銷售已催令剋期到岸不准刻延中牟商水汲縣係商人認辦項城淮甯新鄭係委員捆運有案可查惟長葛太康扶溝新報懸岸業經飭司上緊招商並責令該官商接續捆運源源濟銷下部知之○諭軍機大臣等毛鴻賓等奏閩省賊勢趨重漳州潮防喫緊擊退白垵竄賊化州靈州羅定等處擊賊獲勝各摺片閩省南陽賊匪橫竄白沙石碣等處圖入粵境經方耀等軍併力分勦將石碣等賊巢一併焚毀殲除賊匪幾及萬人另股逆匪由大埔屬之白垵直

樸楓朗營盤經戴朝佐等以少勝眾斃賊甚夥勦辦均屬得手惟賊氛十倍兵勇潮嘉邊界絲互數百里路路可通該逆飛走技窮其欲繞越方耀等軍後路圖竄粵疆自在意計之中見在嘉應之防稍鬆而潮防日形緊急毛鴻賓等已飭李福泰等分紮大埔饒平等處以固藩籬著卽嚴督各軍認真堵勦毋任闖入潮州民情素稱獷悍賊蹤若至一經煽惑必致燎原該署督等務當嚴密防範如後路兵力尙單亟須添調勁旅層層布置萬不可令賊擾及潮防致勦辦愈形棘手方耀等軍前諭粵邊有警仍令回顧著瑞麟等仍遵前旨妥籌調度並著左宗棠徐宗幹飭規取南靖漳浦各軍將該逆就地殲除與粵省入閩之方耀等軍聯絡聲勢妥籌夾擊毋令擾及完善廣西永清匪徒擾及東省靈山縣屬博白土匪復竄化州之合江墟地方均經粵軍擊退羅定官軍復將古眉

大碰雲胎各巢攻克邊境漸次肅清惟粵東粵西處處毗連時虞竄擾必須合力掃蕩擣其巢穴劉坤一見在已抵橫州著張凱嵩飭令該藩司會同東省之梁國安等軍進偪永淳孫逆老巢協力聚殲以除積寇並分軍將河洞老巢及博白等處餘匪與粵軍併力剿除毋任久踞前諭馮子材督辦東江軍務見在容岑一帶賊勢蔓延著卽馳赴羅信之交會合西軍進規岑容以期呼應較靈俟廣東廣西交界處所肅清卽行馳回本任其東江防剿事宜著瑞麟郭嵩燾卽飭李福泰卓興等會同督辦務臻嚴密毋稍疏虞越南匪徒黎惟明等自稱越南舊王率黨攻破海甯府砦街等處該國蠻觸相爭惟當防其內寇著瑞麟等飭令欽州沿邊文武遴撥兵弁及五峒各團練丁扼要嚴爲之備以期自固藩籬所陳安插客民情形尙爲妥協惟土客仇讐已深此次卓興督押客民赴

恩平所屬之那扶等處安插而恩平土民卽敢肆行擄殺見雖全數安插若將來地方官吏撫綏稍不得宜必又再生枝節瑞麟郭嵩燾惟當明定章程使知遵守如有尋釁滋事無論土客必將肇釁之人嚴辦以杜亂萌將此由六百里各諭令知之○甲寅諭軍機大臣等吳棠奏賊竄東境逼近徐州派兵嚴防一摺前因豫省髮捻各匪被勘北竄闖入東境當經諭令僧格林沁暨各省督撫等分派兵勇整頓鄉團扼要截擊見在吳棠以東省之曹單一帶與徐州之豐楊接壤勢極喫緊下游清淮一帶亦須扼要設防已經徐州鎮道分兵嚴杜並飭張從龍等水陸各軍分防成子河及邳宿等處著吳棠督飭各兵勇實力防維設遇賊蹤紛擾卽著認真兜擊毋令竄入裏下河完善之區致成巨患彭玉麟經朝廷簡署漕運總督著懷遵前旨趕緊馳抵漕督署任督飭兵勇實力籌

勅以重職守揚防裁撤兵勇難保無逗畱淮陽一帶希圖滋擾者著吳棠彭玉麟妥爲防範不得任令勾結竄匪滋生事端蒙穎一帶亦係賊蹤繞竄之路著喬松年嚴檄在防兵勇遇賊卽擊毋任竄脫曾國藩前有揚州與金陵僅隔一江可就近派兵接防之奏見在清淮一帶賊蹤均已竄近該處兵力深恐不敷著該大臣一面偵探一面將見存兵勇酌量撥赴江北以資援應劉銘傳一軍能否分兵赴淮東交界處所扼要駐守仍著妥籌調派賊入東境曲阜後匪勢如何及官軍接仗情形尙未接各路奏報著僧格林沁閻敬銘查探確實奏聞僧格林沁所部各隊休息數日後卽著調齊兵勇穩慎進攻閻敬銘亦當督飭丁寶楨等會合各路兵勇分投截剿以期悉數殄除毋令滋蔓直隸與東境毗連劉長佑見經出省卽飭派出各軍妥籌扼擊不得稍涉大意僧格林沁已統

全部馬隊在東省剿賊後路步隊想已陸續趕到合之東省兵勇聯絡進剿聲勢已壯深恐匪眾被擊回竄則豫省又形喫重著張之萬迅飭河北鎮道激勵民團盡力堵遏並飭張曜宋慶等軍迅圖夾擊以收聚殲之效此時豫省各軍俱赴北路追賊南面空虛可慮著吳昌壽懍遵疊次諭旨星馳赴豫以剿爲防俟行入豫省卽趕緊馳奏不准觀望遲延致干重咎將此由六百里各諭令知之○諭惲世臨奏貴州苗匪已出天柱下趨汶溪於北嶺築壘分股沿河肆擾並從曲塘魚乾洞偷渡直犯會同縣境其荊竹園號匪勾結鎮遠苗匪復竄擾銅仁江口一帶惲世臨見飭周洪印等妥籌勦辦檄令戈鑑會同粵軍嚴防黎平髮逆並據惲世臨奏稱閩省汪李二逆因糧食將盡漸有竄動之勢東界各營不敷分布已飭趙煥聯等添募勇丁嚴密防範各等語見在苗匪號匪紛擾

會同銅仁江口等境沅晃靖三屬戒嚴儻防範不密難保不突入楚境李瀚章自簡任巡撫以來屢經降旨嚴催想已起程卽著星速前赴新任妥籌調度前有旨飭令周洪印等軍進紮黔境刻下邊防緊要著該撫飭令周洪印等暫緩赴黔迅速扼要駐紮並探明匪蹤所向妥籌勦辦毋令擾及完善其黎平髮逆卽飭戈鑑會同地方文武及粵省官軍會商勦辦東路防堵事宜並飭趙煥聯等酌量添募勇丁嚴防閩省髮逆毋任竄越李瀚章未到任以前著石贊清嚴飭各軍妥籌辦理儻令該匪竄入楚境必惟該撫等是問將此由六百里諭知李瀚章並傳諭石贊清知之○諭崇實駱秉章奏遵覆屯土各兵未可調派駱秉章奏豫籌酌留秦州擬撤勇丁並階州三路官兵毋須另擇大員統率各摺片據稱屯兵調離本境水土異宜又於關外地勢不甚相合且屯兵應調中多

雇替鈴束既難而需餉尤費至於土練番兵並未經徵調出省均未可訓派各等語所奏自係實在情形屯土各兵卽著毋庸檄調前諭鮑超回川後招募川勇數千出關以厚兵力駱秉章見以在川開招尙須訓練又多供應跋涉之勞甘省張華一軍暨林之望陸續添募之勇約計五千秦州籌糧維艱林之望擬俟階州得手後卽將此起勇兵遣撤不如酌畱歸鮑超統帶所籌尙爲妥便林之望所部勇丁頗稱得力又於甘肅地利熟悉階州見在計日可克著林之望於階州克復後將此起勇丁存畱不必遣撤將來鮑超由川赴甘道經階州卽撥歸統帶出關該提督在川募勇一層卽可毋庸開招著鮑超林之望遵照辦理前令胡中和統率階州三路官兵原以事權歸一庶各路官兵不至互相推諉茲覽駱秉章所奏以胡中和與各將領素相等夷若歸其節制恐諸軍稍存

觀望轉於軍務無益著駱秉章酌量情形所有階州三路官兵如無庸胡中和統率即可調回敘南以重邊防階州各軍由該督妥爲調度督飭諸軍會同陝甘兵勇聯絡聲勢迅殄賊氛毋令賊匪偷竄劉蓉前奏階州二月必可攻克見已三月中旬何以尙無捷音著嚴飭在事將弁會同林之望迅速攻克毋再遲延將此由六百里諭知崇實駱秉章劉蓉並傳諭鮑超林之望知之○乙卯諭軍機大臣等張之萬奏賊由曹單折竄濟甯布置防堵喬松年奏近日情形各一摺前據僧格林沁奏稱賊由曲阜向東南竄逸吳棠奏稱賊蹤逼近徐州諒卽張之萬摺內所稱向兗州迤北一帶竄遁之匪該逆旣向徐州附近一帶奔竄難保不南趨裏下河西竄蒙宿歸德等處僧格林沁馬力如已歇息著卽調齊馬步各隊視賊所向飭令各路兵勇合力圍剿尤須防其北竄仍當一面兼

顧北路節節嚴防毋令蔓延直東境內是爲至要閻敬銘亦當厚
集兵力扼要堵截並多撥勁旅赴前敵隨同協剿毋令賊蹤久畱
東境歸德商邱虞城既各有兵防守毛昶熙亦率所部由汝郡移
紮歸德兵力既厚遇有賊匪竄至務須奮力剿殺不得以驅逐出
境卽爲了事河北一帶見有崔廷桂兩營駐紮卽著張之萬飭該
員聯絡直隸防兵嚴防河岸毋令賊匪搶渡昨有旨諭令喬松年
督令蒙穎防兵截賊繞竄之路見據該撫奏稱已派英翰駐紮雒
河與昨日諭旨相合著卽飭令該藩司認真防堵毋稍疏懈此時
劉銘傳一軍自應從蕭楊一路前進卽著喬松年飭令該提督趕
緊督兵迎頭截剿金陵距皖北較遠劉銘傳進止卽著聽候喬松
年調遣無論行抵何處統歸僧格林沁節制不得專候曾國藩檄
調致誤事機至豫省兵力無多見俱移防東路後路不免空虛吳

昌壽仍當督帶楚北兵勇二三千名迅卽遵奉疊次諭旨趕緊赴豫助剿俾豫省得以騰出兵力專防東路其行抵豫境日期並卽迅速馳奏正在寄諭間復據閻敬銘馳奏賊已回竄甯陽東平一帶復渡汶河回竄甯陽蹤迹飄忽所向靡定東省地勢平行可以任意馳騁且見已裹脅二萬餘人之多設令闖入畿疆爲患益巨總宜厚集兵力四面蹙之同時合力兜剿方能速行剪滅至直東一帶見有兵勇尙恐不敷分布著劉長佑於見調兵勇外速行添調扼要分布如遇賊匪竄至東昌臨清一帶卽行越境會合東省兵勇迎剿閻敬銘於見挑曹州等鎮營各兵外仍添調東路官兵並添募得力勇丁奮力迎截不准縱令北竄僧格林沁務宜繞由北路向南偏剿吳棠彭玉麟卽剋期飭令清淮兵勇北上探賊所向越境截擊不得稍分畛域曾國藩亦卽派兵渡江向清淮一帶

後路援應劉銘傳督帶全軍一面由蕭瑒飛速前進如賊仍在東境卽由蕭瑒一帶前進迎截喬松年添籌兵勇接應劉銘傳後路毋稍遲緩以上應調各軍除由各該省接濟糧餉外如有不足行抵何省卽由何省供支總期士飽馬騰不可稍有缺乏豫省河北防兵止有兩營張之萬仍當添撥重兵嚴密防堵儻令賊匪偷渡河北擾及畿疆必將張之萬從重治罪賊勢鴟張如此各路統兵大臣並該省督撫等務當振刷精神力圖防剿賊蹤儻由何路竄逸卽惟何路帶兵大員及地方督撫是問毋謂誥誡之不早也將此由六百里諭知僧格林沁曾國藩劉長佑吳棠彭玉麟喬松年閻敬銘張之萬吳昌壽毛昶熙並傳諭劉銘傳知之○丙辰諭軍機大臣等吳昌壽奏進紮鄂邊中路相機會剿一摺豫省髮捻各逆雖紛竄東境而餘匪伏莽所在尙多見在僧格林沁馬步各軍

全赴東省跟剿豫省兵力甚單尙須扼守東路兼顧河防儻賊蹤回竄句結不惟豫省有燎原之勢卽楚邊亦在在堪虞是以疊次嚴諭吳昌壽帶兵赴豫廓清豫賊卽以防固楚疆今該撫擬行至德安審定賊勢再定進止機宜雖爲慎重起見未免意存畛域賊情飄忽無定豫省兵力空虛著吳昌壽仍懍遵昨日寄諭迅帶得力兵勇二三千名星馳赴豫實力助剿毋得遷延觀望並將到豫日期迅速馳奏以慰廑繫至楚省沿邊幾千里防務未可稍鬆官文接奉此旨卽於成大吉等諸將中酌派一員統領楚防各軍嚴密防範以便吳昌壽馳赴豫省其在防不得力之兵勇卽責令派出之員簡校裁汰以期兵歸有用應山黃孝安麻隨棗襄樊光鄖等處地當扼要尤須派得力將弁加意防守將此由六百里各諭令知之○己未諭內閣前因沈葆楨奏請賞假回籍省親當經降

旨給假三月嗣據沈

楨奏業於三月初一日起程回籍復經諭

令該撫不必拘定假

早行回任茲據徐宗幹奏稱沈葆楨之母

林氏已於二月二十七日在籍病故沈葆楨天性醇篤諒必籲請

終制惟江西地方雖就廓清而福建漳州等逆未平防務甚關緊

要沈葆楨自簡任江西巡撫以來籌辦勦撫整飭地方辦理悉合

機宜民情素稱愛戴當此邊防喫重之時勢難遽令離任沈葆楨

著賞假百日在籍穿孝加恩賞銀五百兩由福建藩庫給發經理

其母喪事俟假期滿後改爲署理江西巡撫卽行馳赴署任該撫

當仰體朝廷破格奪情之意移孝作忠壘經從事以副委任毋許

固辭○諭軍機大臣等沈葆楨見在丁憂本應准其在籍守制以

盡孝思惟江西毗連閩境防務甚關緊要且該省當兵燹之餘一

切軍情吏治在在需人非公忠夙著民情愛戴之人在彼整頓不

足以資治理特命沈葆楨於百一孝滿後仍回江西署任實爲時事艱難起見卽著徐宗幹傳知沈葆楨於百日孝滿後迅卽馳回江省以慰廑繫沈葆楨向來能顧大局必當仰體朝廷望治之苦衷勉抑哀思墨經從事也前據左宗棠等奏汀連肅清漳州踞匪竄陷漳浦諭令左宗棠徐宗幹嚴飭官軍扼其入海之路並規取南靖漳浦毋令紛竄見在軍情賊勢若何仍著會同左宗棠迅速馳奏省城防堵事宜並著該撫懷遵盛次諭旨嚴密布置毋稍疏虞將此由五百里諭令知之○諭吳棠奏遵防北路竄匪請飭水陸各軍北來駐紮以備堵剿一摺據稱北路竄匪已竄至山東泰安一帶蒙陰縣境又有賊蹤距邳宿均止數百里清淮徐州水陸各軍陸續裁撤揚州一軍久經撤防江北兵力不敷分布請飭黃翼升張樹珊等軍北來駐防等語前因江北兵力較單諭令曾國

藩撥兵援應見據吳棠所奏各情自非厚集兵力不足以資堵剿
著曾國藩仍遵前旨將見存兵勇酌量調撥派令黃翼升帶礮艇
百餘隻到浦駐防並著李鴻章迅派張樹珊吳毓芬等軍馳赴邳
宿一帶防守以固裏下河藩籬賊匪竄入東境蹤迹飄忽兗沂邊
境均與淮徐毗連吳棠已派張從龍等分投設防卽著嚴飭該員
弁等認真遏截遇賊卽擊毋任紛竄俟江南水陸各軍到齊兵力
更厚或飭張從龍等出境剿賊令江南各軍爲後路援應或飭江
南新到之軍充作前敵而令淮徐各軍嚴防要隘均著吳棠彭玉
麟酌度辦理總期與東省之兵合力擊賊迅圖殄滅不得稍分畛
域幸賊不入境卽爲了事彭玉麟未到任以前吳棠責無旁貸務
當激勵各將士妥籌防剿以副委任賊入東境後是否仍踞甯陽
汶上一帶抑又紛竄旁趨官軍接仗情形如何近日未據僧格林

沁奏報朝廷甚深懸繫此股賊匪窮蹙鋌走無巢可歸若不急圖
勦辦必致肆意盤踞逞其荼毒東省爲畿輔屏蔽設日久蔓延關
繫誠非淺鮮著僧格林沁卽飭丁寶楨等並閩敬銘節次所派各
兵勇奮力圍勦毋得退縮觀望致誤戎機賊匪經過之地村落爲
墟官兵採辦糧草深恐不易僧格林沁大兵一到所需尤多著閩
敬銘飛飭完善各州縣趕辦芻糧妥速接濟毋令缺乏俟軍務完
竣准其作正開銷賊匪所到之處每以焚掠裹脅爲事東省伏莽
未淨句結響應本在意中著閩敬銘督飭派出兵勇並各該地方
文武員弁搜捕彈壓以清亂源僧格林沁馬步兵力是否足敷勦
辦仍著查明具奏前諭該大臣行賞犒軍並將陳國瑞酌量保奏
見在陳國瑞諒已到營著傳知該員令其感激圖功實力報效隨
同該大臣馬隊奮勇殺賊儻能始終出力定當破格獎勵以旌其

勞該大臣卽嚴飭各路兵勇四面兜圍繞由北路偏賊南趨派隊跟追毋令賊匪得以喙息以期一鼓殲除黃河沿岸一帶地面遼闊著鄭敦謹挑選河標兵丁於各渡口及水淺處所設卡巡防並將渡船提歸北岸毋令賊匪偷渡劉長佑閻敬銘亦當派兵集團一體嚴防東南兵力漸厚直東一帶兵力尙恐單薄著劉長佑遵奉前旨於見調兵勇外再行添調扼要屯紮俟賊蹤竄近卽著嚴飭防兵迎頭攔擊毋稍疏縱此股賊匪由鄂豫狂竄北趨雖係殘敗之餘尙多著名悍寇若不亟圖掃蕩其患誠無已時見在各路將弁均歸僧格林沁調遣務當統籌勝算分派諸軍處處策應迅殄逆氛儻何路防剿不力卽由該大臣指名嚴參重治其罪將此由六百里各諭令知之○諭曾國藩奏通籌滇黔大局並擬裁東征局務請飭鮑超隨同都興阿等先剿甘省各摺片楊岳斌奏行

抵鄂境分隊進發一摺滇黔兩省距川湘最近自應由川湘鄰接
地方籌畫兵勇接濟餉需就近援應爲力圖進取之策曾國藩擬
請令川湘兩省各專謀一方不必兼顧他省自係規畫大局扼要
立論不爲無見與朝廷之意亦相脗合惟楚南尙須東面屯兵豫
防閩匪由江西一路竄近而川省亦須北顧甘境東防西秀南剿
敘永是曾國藩所籌各節雖屬切中機宜而揆之湘川兩省情形
似尙未能立時舉辦總俟該兩省防務稍有頭緒駱秉章李瀚章
卽當分任貴州雲南兩省之事籌定餉數屆時或照前次諭旨川
湘兩省督撫併力先清貴州後攻雲南或分道進兵各謀一方專
任其事會商酌定議奏後再行降旨辦理曾國藩所稱川湘兩省
旣專任滇黔之事則甘肅之餉應責成江蘇江西浙江湖北四省
不至推諉並據曾國藩已與楊岳斌商定每月由金陵籌銀三萬

兩等語惟江蘇江西浙江湖北四省每月能各接濟甘餉若干兩之處亦須豫爲籌定數目方免臨時貽誤著官文吳昌壽李鴻章沈葆楨孫長紱馬新貽速行覆奏楊岳斌亦須將所需月餉數目究應若干先行覆奏至各省釐金方藉以供億軍餉勢難遽行裁撤前據曾國藩奏請撤粵東釐務曾經明降諭旨暫緩停辦嗣據官文毛鴻賓等亦奏請將楚省並各處釐捐俟數年後再行酌撤與前降諭旨相符以目前時勢而論不獨甘餉賴以接濟卽東南數省善後事宜亦須藉此款應用此事裁撤甚易復設甚難卽或裁撤亦須先取有妨民生者酌量減去其無礙貧民之釐稅尙可量予酌留且東征局前已改爲西征局如果立時裁撤則江蘇等四省供億甘肅新疆之餉更不可稍有短絀致誤軍需甘肅新疆見在盼餉甚急總須籌定數目確有把握再將東征局裁撤方爲

妥善新疆等處軍務自須先將甘省肅清後方可進籌關外以免
後顧之虞曾國藩所論甚是惟此意不可宣布恐致關外各城知
無救援之兵必致人心渙散匪燄益熾是以朝廷於新疆請兵之
奏總言大兵即可出關仍一面密令都興阿等先清甘肅卽此意
也楊岳斌等當默體此意爲要惟哈密一軍爲南北兩路進兵要
隘前已諭令都興阿等派撥德祥鶴齡等統帶兵勇二千餘名前
往駐守當與都興阿等添兵接應妥籌後路糧餉力保此城以爲
將來進兵地步毋稍疏忽前令該督剋期赴甘此時行已抵鄂卽
著親督前隊勇丁迅速前進毋庸俟後隊勇丁一同起程並著遴
派將弁將後隊妥爲管帶分起進發見有應行交辦事件該督行
近陝境卽著飛速馳奏曾國藩旣稱鮑超有嗜利等弊不能獨當
一面著俟該提督抵甘時卽歸楊岳斌節制調遣將來甘境肅清

後此軍應否出關卽著楊岳斌酌量情形調度黃冕未嘗無才而
人品心術俱不可恃前在江浙時聲名狼藉已久亦非因其辦理
東征局朝廷始疑此人也將此由六百里諭知官文曾國藩駱秉
章楊岳斌李鴻章沈葆楨馬新貽吳昌壽李瀚章並傳諭孫長紱
石贊清知之○諭恩麟奏籌撥兵勇駐守固原等語恩麟以州城
新復必須厚集兵力借壯聲威惟省標存兵無多難於抽撥而安
會一帶道路仍梗卽湊撥亦難剋期抵固自係實在情形秦國勝
所統三營本隨張集馨駐紮靜甯見在張集馨已赴固原籌辦善
後靜甯又已就廓清若將秦國勝所部由靜甯就地移紮固原甚
爲妥便著雷正綰卽飭該員帶領所統三營迅速前往與劉正高
等協同防守恩麟卽毋庸由省標撥兵往防至該處善後事宜已
否就緒張集馨應否仍畱固原辦理之處並酌都興阿等酌度具

奏其營汛各缺見經恩麟咨由雷正綰委員署理該提督當於從
征人員內選擇得力可靠者酌量委署期於操防諸事有所裨益
一切軍情仍隨時與都興阿籌商妥辦甯夏近日軍務若何都興
阿穆圖善務當督飭各營將弁奮力攻取及早克復毋得曠日持
久致誤戎機將此由六百里諭知都興阿穆圖善雷正綰並傳諭
恩麟知之○諭廣鳳奎昌奏探聞塔城回眾變亂一摺據稱接扎
薩克親王車林喇布坦等文稱正月初一日塔爾巴哈台回眾變
亂主事職銜巴彥圖自貿易回塔見城門關閉未能進城因赴
土爾扈特王扎薩克等送信等語塔城變亂情形未據明緒奏到
自因道途梗阻文報難通之故該城是否失守仍著廣鳳奎昌偵
探確實具奏土爾扈特王扎薩克等見擬調集兵丁探明塔城情
形籌商進剿惟該盟兵等素未習戰且軍械等項亦多缺乏若令

勉強出征恐亦有名無實不若責令就該游牧地方認真操練備豫不虞儻有賊蹤竄近務當同心協力共殄狂氛將來大兵出關亦可隨同進剿著廣鳳奎昌傳知該親王等遵照辦理並仍探明西路情形隨時呈報塔城爲新疆西北要區如果爲回逆占踞難保不逐漸東趨且古城一帶賊勢鴟張亦恐有北竄科布多之意此時科城之防極爲緊要廣鳳奎昌縱不能派兵援應古城而於本城防守責無旁貸務須先事熟籌嚴密布置以期有備無患烏里雅蘇台庫倫等處亦爲邊疆要地明誼麟興車林敦多布文盛阿爾塔什達均當思患豫防力圖自強之策不得以賊蹤尙遠泄沓成風致啟奸匪窺伺之漸哈密等處待餉孔殷烏科等處如有僻路可通仍著明誼廣鳳等將解到餉銀設法分撥總當穩慎解送毋稍疏忽將此由六百里各諭令知之○辛酉諭軍機大臣等

劉長佑奏督軍行抵威縣見籌布置情形一摺劉長佑於抵威縣後探知該匪由山東濟南竄向平陰肥城又復回竄東平東阿屬境見在布置諸軍杜其北竄擬俟各起兵勇到齊酌撥數營前赴元城南樂以備冠縣朝城一路並派天津通永兩鎮之兵合駐景州以備德州恩縣一路添調海口六營兵飭赴吳橋互相策應該督駐紮威縣居中調度與曲周之楊毓枬清河之冷慶等軍相爲犄角所籌布置情形尙屬周密惟賊氛距黃河南岸甚近直東毗連處所在在可渡處處須防且爲該逆熟徑誠恐兵以分而見單一經偷渡勢又蔓延劉長佑惟當督飭在防各軍確探賊蹤嚴密堵禦仍須添調勁旅使各路兵力厚集無隙可乘以免臨渴掘井致誤事機如賊蹤竄至東昌臨清卽當飭令所派官兵會合東省官軍越境夾擊以勘爲防仍一面自顧藩籬方爲妥善該逆飄忽

靡定聲東擊西乃其慣技僧格林沁馬步各軍及閻敬銘所派丁寶楨等軍務須聯絡策應或由南路緊躡或由北路要截總當將該逆就地殲除實力勦洗毋任擾及畿疆見在辦理情形卽著該親王迅速馳奏河北衛懷所屬瀕河地方均可偷渡難保該逆不被勦西馳以圖北竄屢經有旨諭令張之萬嚴密設防見在賊氛密邇該撫所派防軍能否厚集儻先事漫無準備致賊蹤擾及完善震動畿疆必惟該撫是問吳昌壽當懍遵疊次諭旨速行赴豫助勦以便豫省騰出兵力嚴扼河北一帶之防毋得觀望遷延稍分畛域致干重咎其楚邊防務卽由官文妥爲調度山西去賊雖遠其毗連直豫之平定潞澤等處亦當豫爲籌策以備不虞著沈桂芬多設偵探妥籌布置毋稍疏忽將此由六百里各諭令知之○諭東省地勢平衍在在與江北毗連裏下河一帶完善之區斷

不可令賊蹤闌入著曾國藩仍遵前旨速撥得力兵勇派黃翼升帶礮船百餘隻到浦駐防李鴻章迅派張樹珊吳毓芬馳赴邵宿防守不得稍有延緩致誤事機吳棠彭玉麟於江南諸軍到齊後悉心酌度或令新到之軍作爲前敵而令淮徐各軍分防要隘嚴密布置務臻妥善總須防剿兼施如賊蹤竄近卽令前敵各營實力迎剿與東省之兵合力夾擊毋得稍分畛域以上各節屢經有旨諭知惟恐外省不能及早調發是以再三申諭彭玉麟疊次有旨催令赴任計日當可抵淮務當妥籌調遣以副委任吳棠在江北日久情形最熟應將一切緊要機宜向彭玉麟告述其劉銘傳一軍前寄諭喬松年飭令由蕭礪一路前進仍著該撫迅催該提督剋期啟行與江淮各軍聯絡攻剿毋稍觀望甘肅軍情緊要亟須知兵司道大員前往辦理鞏秦階道金國琛甘涼道李鶴章著

曾國藩李鴻章分飭各該員迅赴新任毋任遲延將此由六百里各諭令知之○諭雷正綰奏追剿會甯踞逆獲勝驛路暢通派兵兼顧陝省門戶遵將地勢賊巢繪圖呈覽各摺片覽奏均悉二月十七至二十六七等日雷正綰派張集馨統領胡大貴等軍攻克青家驛從威戎鎮一帶追剿直至洛門地方沿途節節擒斬殲賊殆盡通渭甯遠隴西會甯境內均無賊蹤鞏郡解嚴該署提督已咨會張集馨折回會甯合力進攻王德勝六營追剿馬賊直趨鹽茶陶茂林已帶兵馳抵會甯該署提督商令陶茂林扼紮安會控制兼顧省城令張集馨鎮撫固原籌辦一切布置均尙周妥陝甘兩省漏網巨逆均踞黑城子鹽茶靈州一帶著雷正綰與曹克忠卽由二營三營李俊堡等處分道進攻以期一鼓殄除仍應穩慎進取不可稍涉大意賊向甯靈一帶賊巢求救意圖糾約大隊拌

死一戰著都興阿穆圖善相機進攻甯夏毋任竄逸如賊有分兵
救援之信可於要路設伏邀擊該將軍等務當與雷正綰等軍聲
勢聯絡更易得手階州賊勢窮蹙著駱秉章懷遵本月十九日諭
旨督令周達武等軍會同林之望等認真剿辦迅圖克復劉蓉所
派出之蕭慶高等軍原係四川派來之隊亦著歸駱秉章調度以
一事權雷恆周顯承等追剿竄陝股匪著俟鄜州等境一律肅清
由雷正綰等查明保獎東路各隘雷正綰仍當時時兼顧毋任旁
竄肆擾雷正綰所進地圖止繪鹽固一隅未能十分明晰著與都
興阿等通籌全局將見在進兵道路賊壘情形一併繪圖貼說以
備省覽正在寄諭間據都興阿等奏固原竄匪撲犯花馬池立時
擊退恩麟奏肅州回匪變亂見調西路各營官兵馳往援剿及階
州擊賊獲勝官兵合圍玉通奏西甯花寺回匪擾害攻陷大通縣

並撲府城請派兵援救各摺片花馬池賊匪雖經擊退難保不去而復來且恐該逆以驕兵之計誘我都興阿務須通飭所部各營晝夜嚴防不可稍有疏失刻下靖遠殘匪竄繞河西中衛縣廣武一帶復形危急而河東又添固原敗逆自靈州以南東互紅柳溝盡係賊氛雷正綰必須趕緊將黑城子賊匪剿滅督軍北進節節掃蕩進規靈州方可與都興阿合軍痛殲醜類卽著相機迅進見在鞏昌情形已鬆曹克忠仍宜分攻鹽茶以分賊勢該將軍卽飭令速拔鹽茶毋稍鬆勁鶴齡一軍疊經諭令赴哈密進援刻下肅州危急著駱秉章等卽檄赴肅州疏通道路以便順道出關肅州爲關外往來糧運要道鶴齡軍餉著寬爲籌備俾利師行穆圖善能否分兵前往援剿之處著都興阿迅速酌度調派恩麟已調兵一千五百餘名赴肅著就見有兵力認真剿洗黎獻已據恩麟派

赴涼州布置甘涼防務所帶兵勇若干能否移撥兼顧肅州著恩麟酌度辦理恩麟摺內所稱間有肅州東關被口外獵戶竄入滋擾焚燒房屋圍困城垣本地回民亦卽變亂等語究竟肅州曾否失守未據奏明殊屬含混著卽趕緊確探具奏如肅州有失致令關內外糧路軍情消息阻隔必治該護督以應得之罪懷之愼之西甯花寺回匪變亂皆由玉通平日議撫撤團漫無準備以致縣城失守郡城危急生民塗炭該大臣一籌莫展惟知令馬文義等往來調停斷難恃以無恐蔣凝學一軍見已行抵何處著楊岳斌飛催該道督率所部徑赴西甯該處有兵一二千名亦卽歸該道調遣以資得力肅州西甯賊勢猖獗都興阿等未能兼顧楊岳斌富兼程前進通籌進剿機宜力維西路大局蔣凝學如離甘尙遠或由楊岳斌先撥數營前赴西甯以免疏虞並著恩麟咨商陶茂

林暫緩兼顧他處務當先行撥兵援剿此外如有可撥之兵亦應分撥肅州以顧全局西甯郡城人心必須鎮定著玉通妥爲激勵固守待援無得一誤再誤致干重罪階州兵已合圍林之望當卽督軍會川陝等軍迅克城池如階州先已克復林之望卽飭所部迅援肅州階州乞降餘匪林之望咨會周達武等妥爲安插毋令再滋事端鮑超近日已否抵川著駱秉章飛催赴甘將此由六百里諭知都興阿穆圖善雷正綰駱秉章楊岳斌劉蓉玉通並傳諭恩麟林之望知之○諭見在雷正綰一軍進剿會甯踞逆正當喫緊必須餉項源源接濟方能迅掃賊氛著閻敬銘沈桂芬張之萬仍遵前旨將協撥慶陽糧臺之款迅速籌解毋稍遲延四川應解之餉於未經謀滇之前仍應按月解甘俟江蘇浙江江西湖北四省議有協甘餉銀成數再行停解並著楊能格一面咨催一面派

員迎提以供要需將此由六百里諭知駱秉章閻敬銘沈桂芬張之萬並傳諭楊能格知之○諭崇實駱秉章奏藏兵深入土司地方已近川邊見飭防範一摺西藏前派李玉圃統帶土兵剿辦瞻對曾據駱秉章奏該土兵甫抵巴塘卽肆搶掠圍攻土司住寨傷斃人命各情當經諭令滿慶等迅將李玉圃及此項土兵趕緊撤回嚴加約束茲據駱秉章奏瞻對已與明正土司具結息爭見未出巢並未與明正土司構兵而藏兵已至道塢將近明正土司地方聲言欲攻瞻對老巢其爲藉圖需索騷擾內地已無疑義瞻對具結息爭一事如尙不可靠未必永弭釁端自當仍由駱秉章遵照前旨飭令史致康妥爲曉諭使之斂兵歸巢如果已相安無事又何煩藏兵從中生事致蠻觸又復相爭著駱秉章嚴飭史致康及打箭鑪文武確加偵探嚴密防範仍責成該員將該土司等具

結息爭一事迅卽辦理完竣務期永遠相安疏通驛站毋致再啟
邊釁一面查明統帶藏兵之員是否卽係李玉圖該革員罪惡昭
著本有旨令其赴川以憑查辦著略秉章卽將該革員設法調令
赴省景紋如尙未起程著卽迅速取道前進一面飭令李玉圖赴
川一面接統其兵如該兵尙遵約束不至如前騷擾尙可會同史
致康等將土司事務辦竣再行撤回若竟漫無紀律貽害地方卽
由景紋迅帶回藏不准闖入川疆致生他變將此由六百里各諭
令知之○壬戌諭軍機大臣等張凱嵩奏收復永淳縣城勦辦梧
州鎮安各匪請飭催援黔軍餉各摺片逆首孫芒廣久踞永淳縣
城經劉坤一督軍進勦連克水陸各隘斃賊一千餘名該逆惶遽
潰走當於二月十三日將永淳縣城收復勦辦尙屬得手所有出
力員弁紳團傷亡勇練准其查明分別奏請獎卹逆首孫芒廣梁

安邦率其餘黨遁聚那檀山澤兩巢必須趕緊進剿一鼓殲擒方免後患儻事機稍緩恐漏網餘生日久又形滋蔓著張凱嵩督飭劉坤一等分道進攻務將首要各逆悉數殲除毋畱餘孽永瀋地方甫復一切善後事宜並著飭屬認真妥辦梧州府屬土匪霍十八句結東西兩省邊境匪徒蔓延容藤岑溪一帶蔣澤春等軍會集鄉團疊次進剿頗有斬擒見在西省大軍已集東省曾敏行一軍亦已越境攻剿著張凱嵩飭令蔣澤春乘此大兵初集之際會合東省官軍分路進攻痛加剿洗馮子材此時計早抵信羅之交著瑞麟郭嵩燾催令該提督嚴檄曾敏行等實力進剿毋稍延緩鎮安府匪股紛紜署知府興福等集團剿辦斃賊多名匪勢漸蹙仍著飭令該署知府督飭鄉團認真防剿一面飭令劉坤一俟南甯軍務稍鬆迅撥勁旅乘勝掃蕩以靖地方楊廷桂一軍進剿貴

州黎平髮逆暫駐永從專待楚黔兩省之兵會合進攻著勞崇光
張亮基李瀚章石贊清嚴飭派出各軍迅速前進合力進攻毋得
互相推諉毫無成效見在廣西援黔一軍餉需積欠甚多自應速
籌接濟著李瀚章石贊清將原撥廣西協餉迅速撥解儻不能如
數籌款卽著按月解足五千兩源源接濟俾楊廷桂一軍不至停
兵待餉貽誤事機署思恩營中軍守備林源海怙惡不悛結黨苛
斂團費擅殺平民經張凱嵩派員拴縛正法所辦甚是嗣後地方
如有似此不法之員仍著嚴密訪拏照此辦理其有被人迫脅情
尚可原者亦當妥爲彈壓毋令生事所陳廣西省咨遣回籍勇丁
爲數無多或令歸農或挑補兵額其有職員弁除實缺飭赴本任
外餘俱發標學習均著照所議辦理將此由六百里諭知瑞麟勞
崇光李瀚章張凱嵩郭嵩燾張亮基馮子材並傳諭石贊清知之

○諭惠慶奏擊退乘夜登城回匪請飭關內援兵兼程前往一摺
古城地方回匪圍攻城垣五十餘日復乘官兵困乏黑夜登城經
官兵奮力衝擊賊匪紛紛墜城轟斃無算懇請飭催援兵星夜前
來等語古城被圍日久兵力疲敝合城兵民涕泣盼救覽奏曷勝
焦灼昨據恩麟奏稱肅州回匪變亂已諭令駱秉章等檄飭鶴齡
一軍先將該處回匪剿辦著恩麟卽行飛札迎提催令該總兵迅
赴肅州將此股殄除後卽行馳赴哈密會同德祥速援古城毋稍
延緩聯捷所統各軍前已有旨令由關內行走昨復諭令劉蓉恩
麟於成祿行抵陝甘時卽飛催該提督前進此時成祿究竟行抵
何處卽著該提督迅速奏報一面仍趕緊前進所有聯捷一軍並
著由成祿總統聯捷卽作爲幫辦該提督等務當合力同心迅速
會合帶兵出關兼程前援古城如行抵肅州時該處業已安定卽

督同鶴齡所部星夜出關毋稍遷延致干咎戾穆圖善一軍能否分撥出關仍著都興阿妥爲籌畫毋得稍分畛域將此由六百里諭知都興阿穆圖善成祿聯捷惠慶並傳諭恩麟知之○癸亥諭軍機大臣等據官文奏稱與楊岳斌會商甘省餉需情形一摺另片奏請將湖北協濟福建滇黔之餉免其撥解全力移解甘肅等語所奏不爲無見甘省軍務正當喫緊之際楊岳斌一軍人數眾多餉需較鉅將來尙須援剿新疆官文務當先行籌撥鉅款源源接濟所有甘省設立後路糧臺代辦軍械火藥等件均著由楚省先行籌撥並著官文迅卽咨商江蘇浙江江西各督撫卽將每月能接濟甘餉若干數目趕緊籌畫並湖北協濟甘餉定數一併籌定俟定議後迅卽奏明辦理至釐金爲餉源所出前據曾國藩奏稱裁撤係專指湖南一省而言其湖北釐局自不在減裁之內官

文當妥爲經理以期無誤供支至官文所稱湖北每月協濟福建雲南貴州餉銀各一萬兩請卽停止以便專解甘肅其滇黔閩三省軍餉請由附近之浙江四川勻撥一節滇黔之餉若照曾國藩所擬將來自可由川湘兩省分任惟福建之餉能否專由浙省供支尙未議及著左宗棠馬新貽酌定協撥之數迅速具奏以便卽照官文所請辦理福建近日軍情若何著左宗棠隨時奏聞以慰廬念將此由六百里各諭令知之○甲子以孟夏時享 太廟上前期親詣行禮○諭軍機大臣等閩敬銘奏賊蹤南竄籌防情形一摺賊由滕嶧圖渡運河復折回東北由繹縣奔至蘭山縣境南趨郟城赴贛榆青口是此股賊匪已出東境海州淮安一帶俱形喫緊著吳棠彭玉麟懷遵疊次諭旨選派得力弁兵扼守要隘毋令一賊一騎闌入腹地仍一面派兵迎頭攔擊如江南調往之

張樹珊吳毓芬等軍到齊即可派赴前敵實力勦洗與東省追賊之兵夾擊以收聚殲之效仍當酌添後路之兵層層接應本日據李鴻章奏已派吳毓芬前赴揚防歐陽利見帶礮船赴江北此時賊已入境著卽迅飭該員等及張樹珊軍飛速前進均歸吳棠彭玉麟調遣揚州亦屬緊要著曾國藩李鴻章另揀得力之員前往鎮撫曾國藩並嚴飭黃翼升礮船星夜前進不得稍有遲誤儻赴援遷延致令裏下河等完善地方被賊蹂躪必惟該督撫等是問劉銘傳一軍前已諭知喬松年令由蕭陽進勦刻下賊竄贛榆正可攔擊著劉銘傳遵旨飛速前進不准延緩李鴻章奏劉銘傳一軍擬添練馬隊之處正恐緩不濟急著曾國藩李鴻章查明楊防所撤之馬隊如尙未起程卽著酌量撥給俾該提督管帶馳勦僧格林沁見已追賊抵滕仍著穩慎進取與江淮諸軍協勦馬步各

隊亦宜稍爲休息養其銳氣毋使疲乏贛榆一帶水田居多尤當加意慎重不可爲賊所乘丁寶楨一軍應由何路進取並著僧格林沁酌量調遣山東所募勇丁認真訓練登萊青等屬防守緊要青州駐防旗營是否足敷守禦著閻敬銘妥籌辦理賊氛雖至江北難保不復行回竄閻敬銘仍當加意防範並飭派出之黃兆昇等嚴防北路英翰一軍前經喬松年派在雒河集扼守見在逆匪去皖境較遠此軍及詹啟綸一軍應由何路防剿著僧格林沁妥籌調度以厚兵力張之萬仍遵前旨督飭將弁於河南北要隘嚴密防堵毋稍大意將此由六百里諭知僧格林沁曾國藩吳棠彭玉麟李鴻章喬松年閻敬銘張之萬並傳諭劉銘傳知之○諭李瀚章奏交卸起程石贊清奏東西兩路防堵情形各一摺上杭諸逆經劉典等軍擊敗後盡趨漳州李侍賢汪海洋均係兇狡賊目

茲復歸併一處難保不爲困獸之鬪紛擾旁趨湖南東路防務自未可稍形鬆勁著石贊清檄飭趙煥聯等軍扼要駐守實力嚴防李瀚章業已起程著卽迅速遄行馳赴新任將該省防剿事宜妥爲辦理汪李等逆見聚一隅正可設法兜圍爲一鼓聚殲之計著左宗棠徐宗幹激勵將弁會同粵東官軍將該逆等就地殄除毋令擾及他處或潛逃入海致窮蹙之寇又肆猖獗瑞麟郭嵩燾卽飭李福泰等嚴密布置力固潮州之防並令由粵援閩之方耀等軍會合進攻協力掃蕩迅殄逆氛孫長紱督飭派出官軍嚴扼本境毋令賊蹤再行回竄黔省天柱縣城復失該匪竄擾靖會邊境分股撲犯遠洞等處荆竹園號匪勾結鎮邊苗匪亦有蠢動之信著石贊清卽飭周洪印等軍先剿天柱之匪力顧靖會腹地並令彭炳武等軍嚴扼沅晃等處以固邊圉將此由六百里諭知瑞麟

左宗棠徐宗幹李瀚章郭嵩燾並傳諭石贊清孫長紱知之○諭
駱秉章奏分剿黔滇股匪疊次獲勝並胡中和辭免總統諸軍各
摺片據稱黔中連城告陷較之滇省尤屬危急擬俟階州踞逆殄
平卽先抽調兵勇會同劉嶽昭攻剿黔邊賊匪以鬆川東之防始
能移撥唐友耕等所部赴滇所籌自係實在情形卽著嚴檄在防
諸軍慎固封守毋令黔滇竄匪復行闖入擾及完善胡中和未便
總統諸軍前據該督奏到業經諭令照所請辦理階州踞逆爲諸
軍四面圍剿其勢已蹙見因糧食將罄偷造木筏圖由河道逃竄
正宜檄飭各軍乘賊困乏聚而殲旃並著駱秉章檄飭階州諸軍
協力齊心將階城踞匪悉數就地殄除毋任紛竄以靖地方如蕭
慶高等軍已敷剿辦階州之匪毋庸胡中和在彼聯絡卽可飭令
回剿敘南一帶著駱秉章妥籌辦理將此由六百里諭令知之○

予江蘇殉難道員史保悠建祠並湖南陣亡訓導楊長蔚四川陣亡副將王步週等祭葬世職○是月蠲免江西都昌縣被授上年祖賦緩徵湖北蘄州等九州縣暨各衛軍田被旱被擾新舊額賦有差